

烦开胃，治霍乱，破产后血闷，捣膏，罨金疮并伤折，止暴痛。蒸煮食之，大能开胃。大明。生食，治霍乱后虚渴。蒸食，甚补五脏，实下焦。同蜜食，令人腹脏肥，不生诸虫，亦可休粮。孟诜。汁：解射罔毒、蟹毒。徐之才。捣浸澄粉服食，轻身益年。臞仙。

## 藕节

【气味】涩，平，无毒。

【主治】捣汁饮，主吐血不止，及口鼻出血。甄权。消瘀血，解热毒。产后血闷，和地黄研汁，入热酒、小便饮。大明。能止咳血唾血，血淋溺血，下血血痢血崩。时珍。

## 莲花

【释名】芙蓉、芙蕖、水华。



【气味】苦，甘，温，无毒。

【主治】镇心益色。驻颜身轻。大明。〔弘景曰〕花入神仙家用，入香尤妙。

【附方】旧二，新二。服食驻颜七月七日采莲花七分，八月八日采根八分，九月九日采实九分，阴干捣筛。每服方寸匕，温酒调服。太清草木方。天泡湿疮荷花贴之。筒便方。难产催生莲花一瓣，书人字，吞之，即易产。肘后方。坠损呕血。坠跌积血心胃，呕血不止。用干荷花为末，每酒服方寸匕，其效如神。杨拱医方摘要。

## 莲房

【气味】苦，涩，温，无毒。



【主治】破血。孟诜。治血胀腹痛，及产后胎衣不下，酒煮服之。水煮服之，解野菌毒。藏器。止血崩、下血、溺血。时珍。

【附方】新六。经血不止瑞莲散：用陈莲蓬壳烧存性，研末。每服二钱，热酒下。妇人经验方。血崩不止不拘冷热。用莲蓬壳、荆芥穗各烧存性，等分为末。每服二钱，米饮下。圣惠方。产后血崩莲蓬壳五个，香附二两，各烧存性，为末。每服二钱，米饮下，日二。妇人良方。漏胎下血莲房烧研，面糊丸梧子大。每服百丸，汤、酒任下，日二。朱氏集验方。小便血淋莲房烧存性，为末，入麝香少许。每服二钱半，米饮调下，日二。经验方。天泡湿疮莲蓬壳烧存性，研末，并泥调涂，神效。海上方。



## 荷叶

【气味】苦，平，无毒。

【主治】止渴，落胞破血，治产后口干，心肺燥烦。大明。治血胀腹痛，产后胎衣不下，酒煮服之。荷鼻，安胎，去恶血，留好血，止血痢，杀菌草毒，并煮水服。藏器。生发元气，裨助脾胃，涩精滑，散瘀血，消水肿痈肿，发痘疮，治吐血咯血衄血，下血溺血血淋，崩中，产后恶血，损伤败血。时珍。

## 红白莲花

【气味】甘，平，无毒。

